

19/09/2003

Dr Mahathir hargai jasa Ling

PUTRAJAYA: Perdana Menteri, Datuk Seri Dr Mahathir Mohamad malam tadi menyatakan penghargaan kepada bekas Menteri Pengangkutan, Datuk Seri Dr Ling Liong Sik atas sumbangannya membangunkan sektor pengangkutan sepanjang beliau menjawat jawatan itu.

Dr Mahathir berkata, Dr Ling berjaya menjadikan pelabuhan negara ini pusat persinggahan kapal kontena besar dalam tempoh kurang lapan tahun.

"Negara membina pelabuhan cukup besar tetapi kapal tak datang. Jumlah kontena yang diuruskan hanya satu juta lapan tahun lalu berbanding 12 juta oleh Singapura pada masa itu.

"Saya hairan kenapa kita ada pelabuhan tapi kapal tak datang. Dr Ling turun ke padang dan mengambil tindakan sehingga menyebabkan kita kini mengurus 10 juta kontena dalam tempoh kurang lapan tahun. Pertumbuhan 1,000 peratus ini adalah hasil usaha Dr Ling," katanya berucap pada majlis meraikan Dr Ling di Seri Perdana, malam tadi.

Turut hadir Datin Seri Dr Siti Hasmah Mohd Ali; Timbalan Perdana Menteri, Datuk Seri Abdullah Ahmad Badawi, isteri Dr Ling, Datin Seri Ena Ling dan menteri-menteri Kabinet.

Pada majlis itu, Dr Ling turut memotong kek hari jadinya yang ke-60 semalam.

Perdana Menteri juga berkata, mereka yang dilantik termasuk dalam kerajaan tidak harus terus memegang jawatan terlalu lama walaupun sudah menyedari mereka harus pergi.

"Kita mesti melihat tanda dan sedar akan masa yang kita perlu turun. Kita juga bukan pemilik Barisan Nasional (BN) tetapi menguruskannya dan akan tiba masa orang lain mengambil tempat kita.

"Apabila orang lain mengambil tempat kita, adalah menjadi tanggungjawab kita untuk menyokong mereka yang dipilih...ini adalah balas budi supaya parti kita terus dapat meneruskan perjuangan dan negara dapat terus bersaing dengan negara lain.

"Mereka yang dipilih juga harus meneruskan perjuangan bagi memastikan negara berkembang dan maju," katanya.

Sementara itu, Dr Ling menyatakan penghargaan kepada Dr Mahathir dan bekas rakan jemaah menteri sepanjang beliau menjawat jawatan dalam Kabinet.

Katanya, kejayaan yang dicapainya kerana kerajaan yang ada adalah mesra perniagaan dan ini menggalakkan pelabur dan peniaga datang, sekali gus membolehkan Malaysia meraih nikmat kedatangan mereka.